

# Societad da musica Trun Svilup da commembars



Lavur d'approfondaziun

Tino Cadruvi  
Via Splecs 22  
7166 Trun

Consorti da scola Sumvitg-Trun  
Trun, ils 20 da matg 2020

**CONSORZI DA SCOLA**  
**SUMVITG-TRUN**



# Index

<b><u>INDEX</u></b>	<b><u>1</u></b>
<b><u>PREFAZIUN</u></b>	<b><u>2</u></b>
<b><u>INTRODUCZIUN</u></b>	<b><u>3</u></b>
<b><u>PART PRINCIPALA</u></b>	<b><u>4</u></b>
<b>LA SOCIETAD DA MUSICA TRUN ENTEIFER 150 ONNS</b>	<b>4</b>
<b>MOTIVS D'ENTRAR ELLA MUSICA – PLI BAUL ED OZ</b>	<b>5</b>
<b>LAS EMPREMAS DUNNAS ELLA SOCIETAD DA MUSICA TRUN</b>	<b>6</b>
<b>SVILUP DIL DIEMBER DA COMMEMBERS</b>	<b>7</b>
<b>CUMPAREGLIAZIUN DILS DIEMBERS</b>	<b>8</b>
<b>INSTRUCZIUN PER GIUVENILS</b>	<b>9</b>
<b>MOTIVAR SCOLARAS D'ENTSCHIEVER A SUNAR IN INSTRUMENT</b>	<b>10</b>
<b>DIFFERENZA DA VEGLIADETGNA</b>	<b>11</b>
<b>FUSIUNS – IN SCENARI CHE MANTEGN LA MUSICA ELLA REGIUN?</b>	<b>12</b>
<b>GIDONTERS</b>	<b>13</b>
<b>LA SOCIETAD DA MUSICA TRUN SCO HARMONIA</b>	<b>13</b>
<b>IGL AVEGNIR</b>	<b>14</b>
<b><u>PLAID FINAL</u></b>	<b><u>15</u></b>
<b><u>FONTAUNAS</u></b>	<b><u>16</u></b>
<b>LITTERATURA</b>	<b>16</b>
<b>ILLUSTRAZIUNS</b>	<b>16</b>
<b><u>APPENDIX</u></b>	<b><u>16</u></b>
<b>INTERVESTAS</b>	<b>16</b>
<b>GLIESTAS</b>	<b>16</b>

## Prefaziun

Gl'onn 2016/17 sun jeu entraus sco commember activ en la Societad da musica Trun. Il sunar ei spert daventau miu hobi preferiu. Ord quei motiv hai jeu buca stuiu encuirir ditg in tema per la lavur d'approfundazion.

Mias finamiras principales da quella lavur ei emprender d'enconuscher meglier la Societad da musica Trun. Plinavon vi jeu perscrutar il svilup da commembers naven dalla fundaziun entochen il di dad oz. Il fatg che aschi paucs giuvenils sunan activ en ina musica ha fatg ponderar mei. Jeu sperel da saver anflar ora daco ch'il diember da commembers sesminuescha adina pli fetg e che la munconza da musicants giuvens ei aschi gronda.

Il cudisch che la Societad da musica Trun ha ediu per il giubileum da 150 onns ei staus per mei in grond agid da survegnir in'investa dalla hisoria della musica. Ulteriuramein sun jeu staus avisaus sin informaziuns ed agid da pliras persunas. Ad ellas sauda miu cordial engraziament per lur breigia.

## Introducziun

Per haver ina clara survesta, tgei che duess vegnir menziunau ni intercuretg en mia lavur d'approfundaziun, hai jeu tschentau tschun damondas ni tesas.

- En tgei onns ei il diember d'entradas da commembers novs semidaus marcantamein?
- Va quei svilup era a prau cun la midada da habitonts da Trun?
- Tgei motivs han menau a quellas midadas?
- Ein ils motivs d'entrar ella societad da musica pli baul ed oz semidai?
- Dat ei pusseivladads per midar il svilup actual?

All'entschatta da mia lavur hai jeu fatg ina viseta egl archiv da Trun. Leu hai jeu legiu vegls protocols dalla Societad da musica Trun per eruir il diember da commembers. L'emprema giesta che hai anflau, ei digl onn 1924. Plinavon hai jeu consultau ils diembers da habitonts dalla vischnanca da Trun. Quels dus svilups cumparegliel jeu ed enquarel semeglionzas. Aschia vesel jeu, sch'il diember da commembers sesminuescha per il motiv dalla digren da nossa populaziun.

Jeu fetsch intervestas cun treis persunas *Adrian Degonda, Robert Tuor e Martina Berther* sur da differents temas. Aschia sperel jeu da survegnir dapli informaziuns ch'jeu drovel per rispunder allas damondas ni tesas.

## Part principala

### La Societad da musica Trun enteifer 150 onns

Igl onn 1864 han siat umens da Trun fundau la ‘compagnia de musicants a Trun’ sco quella musica haveva num l’entschatta. Aschia s’auda quell’uniun tier ina dallas diesch pli veglias musicas el cantun Grischun. (Societad da musica Trun, 2014)

Da quei temps regevan otras relaziuns. La tecnica e l’industria eran per all’entschatta dil svilup. La populaziun viveva pil pli dil puresser. Ei era in eveniment tut special, sche ins saveva inagada ir ad in concert ni teater, nua ch’ins saveva emblidar ils quitaus e la lavur dil mintgadi e sedivertir. (Societad da musica Trun, 2014)

Ch’il viver era auters, semuossa per exempl en ina descripziun dils exercezis. Ei vegneva sunau cun glischs da candeilas. Pér 40 onns suenter la fundaziun ha la musica da Trun saviu sunar cun glisch electrica. Aschia descriva ina pasascha ord il protocol: «**1924:** Las producziuns da sogn Silvester han giu liug per l’emprema gada cun cazzola electrica. Muort quei progress modern ha il portacazzolas piars la piazza.» (Societad da musica Trun, 2014, pg.124) La pretensiun da frequentar ils exercezis vegneva tenida ault. Seteneva zatgi buca vid quei, saveva quei haver consequenzas. «**1950:** Pliras admoniziuns al pauchist, da silmeins mintgaton prender part als exercezis ed allas producziuns, ein stadas vanas. Consequentamein eis el vegnius sclaus dalla societad. (Societad da musica Trun, 2014, pg.124 / Societad da musica Trun, 2014)

Era il svilup dil vitg ha pretendiu midadas tier las tradiziuns dalla musica. Muort la carschen dil trafic ha il viadi da processiun da Sontgilcrest stuiu sviar. «**1964:** Cun risguard sil traffic carschent ha la processiun da Sontgilcrest buca liug pli atras il vitg, mobein da Pustget a Gravas.» (Societad da musica Trun, 2014, pg.124)



*Illustraziun 1: Societad da musica Trun, 1917  
(Societad da musica Trun, 2014, pg.24)*

## Motivs d'entrar ella musica – pli baul ed oz

Cun la nova uniu han ins vuliu porscher als convischins da Trun ina midada dil monoton mintgadi e far ensemes musica. Plinavon savevan els s'inscuntrar cun commembers da divers uclauns dalla vischnaunca. Ils exercezis vegnevan principalmein fatgs igl unviern, cura ch'ei vegneva baul stgir e las seras eran liungas. Aschia era il prender part allas seras d'exercezis ina biala occupaziun. (Societad da musica Trun, 2014)

Sper il far musica ei era il star da cumpignia stau in impurtont motiv per la fundaziun dalla Societad da musica Trun. Ins vuleva tgirar la cumionza. Aschia san ins leger en in anterius cudisch d'expensas dalla societad ord igl onn 1871 ils plaids: «Stai si el vitg e buiu en compagnia.» (Societad da musica Trun, 2014, pg.19 / Societad da musica Trun, 2014)

Ozildi han ins buc aschi bia difficultads d'anflar in'occupaziun per il temps liber. Tras la digitalisaziun han ins la pusseivladad da sedivertir a moda varionta a casa. Per tener il contact e setschintschar ein ins buc avisaus sin s'entupadas. Ins sa schizun secomunicar cun glieud sin auters continents cun agid digl internet. Aschia enzatgei fuss buca stau pusseivel dils temps dalla fundaziun. (Intervesta, Degonda, 2019)

Entrar en ina musica ha era savens da far cun la tradiziun da famiglia e contuorn. Sche geniturs ni fargliuns ein gia musicants activs animeschan els in l'auter. Aschia vegn il plascher vid la musica daus vinavon alla proxima generaziun. (Intervesta, Degonda, 2019)



*Illustraziun 2: Famiglia Tuor, 1987: da seniester: Philipp, Renato, Anton, Robert e Corsin  
(Societad da musica Trun, 2014, pg.98)*

## **Las empremas dunnas ella Societad da musica Trun**

El 19-avel ed aunc lunsch el 20-avel tschentaner haveva la Societad da musica Trun sulettamein commembers. Pér suenter 110 onns, pia gl'onn 1974 ei l'emprema dunna, Jazinta Lombriser, entrada ella societad. (Societad da musica Trun, 2014)


Il diember da dunnas ei continuadamein carschius. Igl onn 2005 dumbrava la Societad da musica Trun per exempla endisch commembras activas. Quellas han lu era surpriu entgins posts ella musica. Mengia Risch-Decurtins ei stada l'emprema dunna el comite, e quei sco actuara. Actualmein ha la Societad da musica Trun sis musicantas. Ina da quellas fa era part dil comite sco cassiera. (Societad da musica Trun, 2014)

## Svilup dil diember da commembers

Probabel ein ils siat commembers fundaturs stai dabiers onns mo denter els. Igl emprem commember ufficial ei numnadamein pér entraus 12 onns suenter, pia igl onn 1876. Denton cumparan gia avon dus ulteriurs numbs els cudischs da cassa, Sep Antoni Wolf e Mathias Tomaschett. Tgei funcziun che quels havevan, ei denton buca clar. Gidavan ei mo ora ina ni l'autra gada senza entrar ella uniu ni han ins forsa emblidau da notar els sillla gliesta da commembers? (Societad da musica Trun, 2014)

Pli tard ein gest treis umens entrai el medem mument ella musica. Pia dumbrava la Societad da musica Trun suenter 15 onns d'existenza gia entuorn 12 commembers. Igl onn 1917 era il diember s'augmentaus sin 19 commembers activs. L'uniu crescha pia ad in crescher – mo con ditg aunc? (Societad da musica Trun, 2014)

Per saver rispunder a quella damonda hai jeu visitau gl'archiv communal da Trun ed encuretg en vegls cudischs suenter gliestas da commembers. Quels diembars hai jeu silsuenter visualisau en in diagramm.



Illustraziun 3: Svilup da commembers - Societad da musica Trun

El diagram san ins veser bein il svilup da commembers. Per exemplu vesan ins ch'il diember ei carschius fetg naven digl onn 1944.


Els onns 1960-1970 ha la Societad da musica Trun dumbräu rodund 45 musicants activs – aschi biars sco aunc mai.

Naven digl onn 1980 ei il diember da commembers denton adina vegnius pli e pli pigns. Actualmein dumbrä la Societad da musica Trun mo pli 26 commembers.


## Cumparegliazion dils diembers

Jeu hai cumparegliau il diember da commembers dalla Societad da musica Trun cun il diember da habitonts dalla vischnaunca da Trun. Finamira ei, da saver intercurir sch'il diember da commembers sesminuescha per il motiv dalla digren dalla populaziun.

Cu jeu hai fatg ils dus diagrams sun jeu staus surstaus. Ins sa numnadamein veser fetg biaras caussas communablas. Per exempl entcheiva il diember tier omisdus diagrams a sesminuir constantamein denter ils onns 1970 e 1980. Muort la fusiun dallas vischnauncas da Trun e Schlans dat ei gl'onn 2012 in augment da habitonts. Quella fusiun ha denton giu negina influenza sil diember da commembers dalla Societad da musica Trun.



Illustraziun 4: Svilup da habitonts - Vischnaunca Trun



Illustraziun 5: Cumparegliazion dils diagrams

Suenter haver cumparegliau ils dus diagrams, prendel jeu la conclusiun che la digren da nossa populaziun sa esser in motiv daco che la Societad da musica Trun ha adina pli paucs commembers. Dat ei forsa aunc auters motivs?

## Instrucziun per giuvenils

Gl'onn 1923 ha la Societad da musica da Trun entschiet ad instruir giuvens che havevan plascher vid la musica. Quella scolaziun surpriseva pil pli il dirigent. Aschia han ins procura per la proxima generaziun da musicants. Schizun ina musica da giuvenils han ins saviu possibiliter a Trun. Cul temps han era auters commembres dalla musica instruiu ils giuvens musicants, sco per exempl Robert Tuor ni Adrian Degonda. (Societad da musica Trun, 2014)

La Formaziun Surselva ha era entschiet ad instruir scolars cun instruments da stuors. Perquei han els dumandau la Societad da musica Trun da surdar il pensum dad instruir giuvenils. Cun la stad 2012 ha la musica da Trun surdau quella incumbensa da scolaziun. Ils scolars prendan aschia part ad ina scolaziun regiunala. Mo ei quei uss atgnomein in avantatg ni disavantatg? (Intervesta, Tuor, 2019 / [www.musicatrunk.ch](http://www.musicatrunk.ch), 23-04-2020)

Tenor Adrian Degonda ha quei avantatgs denton era disavantatgs. Ils giuvenils vegnan instrui da persunas professiunalas e survegnan aschia ina megliera instrucziun. Plinavon ei l'instrucziun garantida pils giuvens musicants e la musica ei buc avisada dad anflar enzatgi ord las atgnas retschas che surpren il pensum da scolaziun. Il success, ch'ils scolars stattan lu suenter era ella musica, ei ussa procentualmein pli gronds. (Intervesta, 2019)

Ils disavantatgs ein che la Formaziun Surselva ha negin interess da promover ina specifica societad da musica. Per els eis ei impurtont ch'els survegnien avunda scolars e miran buca che mintga musica ord la regiun survegni musicants giuvens. Plinavon ei l'elecziun dad instruments bia pli gronda che pli baul. Ins sa per exempl eleger naven d'instruments da lenn entochen tier instruments corda ni da percussiun, tut tgei ch'ins less. Quels scolars han suenter buca la pusseivladad d'entrar cun lur instrument en ina musica da brass. (Intervesta, Degonda, 2019)



*Illustraziun 6: Musica da buobs, 1943: da seniester: Josef Tuor, Bistgaun Cavegn, Christoffel Quinter e Giusep Demont (Societad da musica Trun, 2014, pg.105)*

Robert Tuor, ch'ei gia 45 onns ella Societad da musica Trun ed ha era sez instruiu ils giuvens musicants encorscha, ch'il diember da musicants giuvens seigi sesminuius fetg, dapi che la Formaziun Surselva instruescha. Tenor Robert ein ils cuosts da scolaziun responsabels per quei svilup. Cura che la Societad da musica Trun scolava, eran quels cuors bunamein gratuits ed ils instruments vegnevan mess a disposiziun dall'uniu. Ussa ston ils geniturs surprender ils cuosts ed era procurar sez pigl instrument. Quei san ni lessan biars buca prestar. (Intervesta, 2019)



*Illustraziun 7: Musica da buobs 1953 (Societad da musica Trun, 2014, pg.105)*

## Motivar scolarAs d'entscheiver a sunar in instrument

Gl'atun 2019 ha la Societad da musica Trun fatg ina viseta tier la tiarza entochen la sisavla classa da Trun. Leu ein differents instruments da stuors vegni presentai ed ils scolars han giu la pusseivladad da sunar entgins tuns.

Cun quella viseta ella scola ha la musica empruau da motivar ils scolars da sunar in instrument da stuors. Sche quei ei lu reussiu, vesan ins el dacuors dil proxim temps. Scadin cass less la musica da Trun far regularmein aschia ina viseta en scola. (Intervesta, Degonda, 2019)

## Differenza da vegliadetgna

En ina societad da musica ei il spectrum da vegliadetgna fetg gronds. Giuvenils da 14 onns lavuran vid il medem project sco carschi da 60 onns. En autras uniuns ei quei buca aschia. Ins ha pil pli cumpignia cun camerats dalla medema vegliadetgna. Ella musica denton ein ins modus tochen treis giuvenils, mintgaton schizun persuls sco giuven.

Ei fuss pia d'avantatg ch'ina gruppera da giuvenils entrass communablamein en ina societad da musica. Lu han quels cumpignia dalla medema vegliadetgna e motiveschan in l'auter. Plinavon han auters forsa schizun dapli curascha d'entrar en la musica. Che quei funcziuna demuossa igl exempli dalla Societad da musica Surrein/Rabius. Leu eis ei schizun reussiu da realisar ina pintga musica da giuvenils, la *Cool Band*. En quella sunan era musicants dallas musicas da Trun e Sumvitg/Cumpadials. (Intervesta, Degonda, 2019 / Intervesta, Berther, 2020)

Tenor mei porta la differenza da vegliadetgna denton era avantatgs. Ins sa sco giuven seprofitar dalla experientscha da sunar dils auters ed aschia survegnir entgins tips e trics dad els.

## Fusiuns – in scenari che mantegn la musica ella regiun?

Per saver rispunder a quella damonda, hai jeu fatg in'intervesta cun Martina Berther. Ella ei presidenta dalla Societad da musica Surrein/Rabius, fusionada gl'onn 2009.

In dils motivs per la fusiun dallas duas societads da musica da Rabius e da Surrein ei stau la munconza da commembers activs. Ha quella fusiun lu era purtau il sucess giavischau a liunga vesta ni mo all'entschatta? (Intervesta, Berther, 2020)

Tenor Martina Berther hagi la Societad da musica Surrein/Rabius dumbrau gest suenter la fusiun entuorn 40 commembers. Quei diember ei lu spert puspei sesminuius. Biars han abdicau ord il motiv ch'ei seigien ussa aschi biars ed aschia fetschi lur abdicaziun buca difficultats alla musica. Suenter cuort temps dumbrava la musica puspei denter 25 e 30 commembers. Ins sa denton buca di, co ei fuss iu vinavon cun las duas musicas senza la fusiun. (Intervesta, 2020)

Ei ha era dau bia lavur e pass difficilis entochen che la fusiun ei stada reussida. Sco bunamein tier mintga uniu ni vischnaunca che fusionescha ha il num dau bia da studegiar. Tgi leva Surrein ordavon e tgi Rabius. Era las statutas han duvrau bia temps e pazienza. (Intervesta, Berther, 2020)

Sche duas musicas fusioneschuan, vegnan era dus stils da musica ensem. Tier la Societad da musica Surrein/Rabius ei quei semussau suandont. L'antieriura musica da Surrein fageva plitost musica per il vitg ed embeleva las fiastas da baselgia cun musica. Tier la Societad da musica Rabius eran quels puncts era presents el programm digl onn, denton vulevan els era far musica da concurrenza e semiserar cun outras musicas tier las fiastas da musica. (Intervesta, Berther, 2020)

Ei ha pia duvrau in temps da preperativas, tochen tut era sclariu e la musica era veramein unida. Forsa era quei denton la suletta via da salvar la musica els dus vitgs – tgisà

## Gidonters

Sche ina musica da brass less far buna musica, sto quella esser completa. En nossas musicas eis ei denton buca pusseivel da saver occupar tut las vuschs ed instruments cun commembers ord l'atgna societad. Per evitar talas largias segidan musicants ord autres musicas – aschi numnai musicants gidonters. Aschia san ins contonscher ina megliera qualitad dalla musica. Ei la musica sin in ault niveau, motivescha quei. Ils musicants han pli grond plascher, denton era igl auditori. Forsa survegn in ni l'auter lu schizun gust d'entscheiver a sunar in instrument da stuors. (Intervesta, Degonda, 2019)

Gidonters remplazzan buca in commember. Els sustegnan in register ni l'auter tier munconza Ils commembers dalla musica han adina la prioritad d'eleger sez, tgei ch'els lessan sunar. (Intervesta, Degonda, 2019)

La Societad da musica Trun ha giu grond success cun gidonters. Quei semuossa cura ch'entgins gidonters vegnan a fetg biars exercezis. Plinavon ha la musica schizun saviu prender si anteriurs gidonters sco commembers dalla musica. (Intervesta, Degonda, 2019)

---

## La Societad da musica Trun sco harmonia

La Societad da musica Trun ha era empraua ora ina metoda extraordinaria da survegnir pli biars commembers. Per il concert primavaun 2008 ein instruments da lenn, sco clarinetas e saxofons vegni integrai ella musica. Damai che quei experiment ha giu bien success, ein quels instruments da lenn stai presents entochen gl'onn 2012 en la Societad da musica Trun. Duront quei temps ei la musica sepresentada sco harmonia. Suenter quels quater onn ei la Societad da musica Trun returnada tier siu origin da brass, sco ordinari en la Surselva. (Societad da musica Trun, 2014)

## Igl avegnir

La Societad da musica Trun ei ussa gia varga 150 onns activa. Enteifer quels onns ei la musica stada presenta sin differentas modas ella cultura dalla vischnaunca. Segir inagada a moda musicala, denton era sociala. Ella embellescha las fiastas dil vitg e da baselgia cun musica e dat aschia ina tempra festiva. Plinavon delectescha la Societad da musica Trun igl auditori cun in concert annual. Amitgs dalla musica han la pusseivladad da s'entupar e luvrar vid in project communabel, numnadamein il far musica e star da cumpignia. (Societad da musica Trun, 2014)

Ch'igl ei buca sempel da mantener las musicas dil vitg muossan differents exempels ord la regiun. La Societad da musica Medel ha gia stuiu sesligiar. La Societad da musica Danis/Tavanasa ha era decidiu da sesligiar suenter il giubileum da 100 onns. Denton era otras musicas han da cumbatter encunter la sminuziun dil diember da commembers e vegnan a stuer prender decisiuns els proxims onns. Co fa quei, sto mintga singula musica decider. Ina vegn ad empruar quei cun promover dapli ils giuvenils ed otras emprovan forsa da motivar anteriurs musicants da puspei prender igl instrument els mauns. Forsa dad ei era ulteriuras fusiuns, gie schizun tut otras vias ein pusseivlas. Nus vegnin a veser tgei ch'igl avegnir porta.

Jeu less aunc enumerar entgins scenaris ch'jeu quettel realistics per gl'avegnir da nossas musicas ella regiun. Jeu sai s'imaginar, che certas musicas ston sesligiar e musicants che lessan sunar vinavon, entran en in'autra musica. Aschia dess ei pli paucas, denton pli grondas musicas. In secund scenari savess esser, ch'ei dat fusiuns denter differentas musicas. Sco jeu hai denton gia menziunau, han las fusiuns buca igl effect giavischau a liunga vesta. Il cass optimal fuss, ch'igl interess vid la musica crescha puspei e las musicas survegnan dapli commembers.

## Plaid final

Cun scriver quella lavur d'approfundaziun sundel jeu sefatschentaus cun la historia dalla Societad da musica Trun. Entras leger il cudisch che la societad da musica ha scret per siu giubileum da 150 onns, hai jeu survegniu ina vesta dils schabetgs e svilups dalla musica naven dalla fundaziun entochen ussa. Era dil mintgadi d'antruras hai jeu saviu emprender enqual caussa che ha fatg surstar. Ei ha dau grondas midadas en quels onns. Ils instruments, ils tocs da musica ed era la tenuta dils musicants ei semidada.

Jeu hiel en quella lavur fatg bia ponderaziuns daco che las musicas dil vitg han da cumbatter encunter la digren da commembers e tgei che ins savess far per prevegnir a quei svilup negativ. Malgrad che hai anflau entgins fatgs che meinan a quella digren da commembers, dat ei negina sligiaziun adequata che funcziuna tier mintga musica.

# Fontaunas

## Litteratura

Societad da musica Trun (2014). 150 onns Societad da musica Trun 1864-2014. Glion: communicaziun.ch

## Illustraziuns

Illustraziun dalla cuviarta: Societad da musica Trun, fiesta da musica cantunala Arosa 2019  
 (www.musicatrunk.ch, 12-05-2020)

Illustraziun 1: Societad da musica Trun, 1917 (Societad da musica Trun, 2014, pg.24)	4
Illustraziun 2: Famiglia Tuor, 1987: da seniester: Philipp, Renato, Anton, Robert e Corsin (Societad da musica Trun, 2014, pg.98)	5
Illustraziun 3: Svilup da commembers - Societad da musica Trun	7
Illustraziun 4: Svilup da habitonts - Vischnaunca Trun	8
Illustraziun 5: Cumparegliazun dils diagrams	8
Illustraziun 6: Musica da buobs, 1943: da seniester: Josef Tuor, Bistgaun Cavegn, Christoffel Quinter e Giusep Demont (Societad da musica Trun, 2014, pg.105)	9
Illustraziun 7: Musica da buobs 1953 (Societad da musica Trun, 2014, pg.105)	10

## Appendix

## Intervestas

- Adrian Degonda
- Robert Tuor
- Martina Berther

## Gliestas

- Giestas da commembers Societad da musica Trun
- Giesta da habitonts Vischnaunca Trun